



# **JABATAN PERKHIDMATAN VETERINAR MALAYSIA**

## **LAPORAN LIPUTAN MEDIA**

| <b>Isnin , 25 April 2022</b> |                                                                                           |
|------------------------------|-------------------------------------------------------------------------------------------|
| 1.                           | Jualan daging mentah melonjak                                                             |
| 2                            | 2,000 ekor babi di 19 ladang 'hilang'                                                     |
| 3                            | Peniaga haram warga asing 'perompak' senyap wang negara                                   |
| 4                            | -Bekalan daging raya di N.Sembilan cukup<br>-Harga enam barang diturunkan di Shah Alam    |
| 5                            | Daging lembu di Indonesia RM44 sekilogram                                                 |
| 6                            | Jakim jangan lengah siasatan                                                              |
| 7                            | Kartel ibarat raja                                                                        |
| 8                            | Kartel hambakan penternak                                                                 |
| 9                            | -Larangan import lembu, kerbau Thailand dimansuh<br>-Projek tanam jagung lepas Aidilfitri |

DISEDIAKAN OLEH:

**SEKSYEN KOMUNIKASI KORPORAT  
JABATAN PERKHIDMATAN VETERINAR MALAYSIA**

# Jualan daging mentah melonjak

Permintaan daging lembu dan kerbau meningkat sehingga 50 peratus

Oleh MUHAMMAD YUSAINI MOHAMAD YUNUS

SHAH ALAM

**P**ermintaan daging lembu dan kerbau tempatan meningkat sehingga 50 peratus menjelang Hari Raya Aidilfitri bagi tahun ini.

Pengusaha ternakan kerbau, Asaruddin Zolkepli, 37, berkata, sehingga kini penjualan daging berkenaan mendapat permintaan tinggi iaitu lebih daripada 100 kilogram (kg) berbanding tahun sebelum ini.

"Untuk hari raya kali ini, saya sudah menerima tempahan sehingga 100kg dengan anggaran tujuh ekor kerbau yang akan disembelih nanti."

"Dalam minggu ini juga, orang dah boleh balik ke kampung, jadi memang akan meningkat sehingga 30 hingga 50

peratus," katanya kepada *Sinar Harian* pada Ahad.

Jelas Asaruddin, bilangan pembeli masih sama cuma kuantiti daging yang dibeli meningkat lebih-lebih lagi mereka yang pulang beraya.

"Kalau tahun lepas, mereka hanya menempah dua hingga tiga kilogram sahaja sebab Perintah Kawalan Pergerakan (PKP), orang tidak boleh balik."

"Kali ini mungkin ada yang tempah tujuh hingga 10kg. Lagi-lagi saya jual dengan harga sama seperti tahun lepas iaitu RM35, jadi permintaan itu banyak," ujarnya.

Sementara itu, Muhammad Nur Firdaus Zulkifli, 27, berkata, walaupun harga meningkat sedikit berbanding tahun-tahun sebelum ini, namun ia tidak mempengaruhi permintaan.

"Sebelum ini harga RM35, tahun ini naik sedikit RM36 dan kami mula menjual pada Khamis, Ahad serta yang terakhir Isnin sebelum raya. Pembeli sentiasa ada walaupun harga naik sedikit sebab mereka faham."

"Anggaran dalam 10 ekor untuk raya kali ini dan empat daripadanya kami *standby* hari



Penjual membuat persediaan dengan menambah bilangan kerbau dan lembu bagi bekalan daging segar untuk persiapan menyambut Aidilfitri nanti.



ASARUDDIN



MUHAMMAD NUR FIRDAUS



SUHAIMI



ROZI

Isnin sebelum raya, itu sebab memang akan habis," ujarnya.

Selain itu, Pengusaha daging lembu, Suhaimi Hamid, 50, berkata, dia menjangkakan lebih 15 ekor lembu akan dijual pada kali ini dengan 200kg hingga 300kg.

Dia bagaimanapun berkata, harga yang dikenakan lebih mahal berbanding pengusaha lain kerana daging yang dijual lebih berkualiti.

"Saya jual kepada pelanggan 100 peratus daging segar, kualiti

ti A, daging premium dengan harga RM48 hingga RM55 sekilo."

"Slogan kami pun kepuasan pelanggan adalah keutamaan kami, walaupun harga agak tinggi sebab potongan daging cantik, segar jadi kualiti ini yang orang cari."

"Bagaimanapun, peningkatan permintaan kali ini kita tidak boleh agak sebab daging premium, kualiti terbaik jadi orang akan datang kalau nak

daging seperti ini," jelasnya.

Penternak kerbau, Rozi Mohd Sharif, 54, berkata, permintaan daging kali ini lebih tinggi dan melebihi anggaran yang dijual sebelum ini.

"Saya jual di kawasan kampung sahaja kira macam pasaran kampung dalam anggaran 200kg, harga RM38 kalau sekarang sebelum ini saya jual RM32 sebab ada yang jual RM40 saya ambil bawah daripada orang lain. Walaupun dengan harga seperti ini orang memang ramai akan membeli."

"Tahun ini memang ramai, dan tidak cukup sebab macam di sini orang memang nak daging kerbau berbanding lembu," katanya.

Pada masa sama, Kamaruddin Abdul Hamid, 53, berkata, ada dalam kalangan pelanggan mereka sudah membeli sejak awal Ramadan bagi bekalan daging hari raya.

"Selepas dua minggu puasa ini peningkatan itu semakin ketara berbanding tahun-tahun sebelum ini."

"Malah dua minggu terawal pun mereka dah mula membeli, saya ingatkan beli untuk makan berbuka dengan keluarga tetapi untuk stok hari raya."

"Jadi peningkatan itu agak ketara, kalau saya jual 10 ekor memang habis sehari sebelum raya atau dua hari sebelum raya memang akan habis," katanya.

## HARGA SEMASA DAGING LEMBU/KERBAU

|                |                   |
|----------------|-------------------|
| Daging         | RM35 hingga RM 38 |
| Batang Pinang  | RM40              |
| Daging cincang | RM32              |
| Tulang rusuk   | RM34              |
| Tulang         | RM32              |
| Barang dalam   | RM35              |

\* Anggaran harga bagi setiap 1kg



# 2,000 ekor babi di 19 ladang 'hilang'

Dipercayai dibawa keluar tanpa pengetahuan pihak berkuasa

Oleh SYAMILAH ZULKIFLI

## SEREMBAN

**K**ira-kira 2,000 ekor babi di 19 ladang di Kampung Baru Tanah Merah Site A, Port Dickson dipercayai dibawa keluar tanpa pengetahuan pihak berkuasa.

Ia selepas satu ladang di kawasan itu disahkan dijangkiti virus Demam Babi Afrika (ASF), sekali gus menyebabkan 275 ekor babi terpaksa dilupuskan.

Exco Pertanian dan Industri Asas Tani Negeri Sembilan, Datuk Bakri Sawir berkata, perkara itu hanya diketahui selepas pasukan Jabatan Perkhidmatan Veterinar Negeri Sembilan (JPVNS) yang membuat pemeriksaan mendapati kesemua ladang itu telah kosong.

“Susulan kes ASF dilaporkan di sebuah ladang sebelum ini, kita buat pemeriksaan dari ladang ke ladang untuk mengambil sampel, tapi semuanya telah kosong.

“Pemantauan terus dilakukan dan perkara ini sudah dimaklumkan kepada pihak polis.

“Jika kita mempunyai maklumat, kita akan masuk serta-merta untuk tindakan lanjut,” katanya selepas meninjau jualan daging dan produk asas tani di Pasar Tani Paroi Jaya serta mempromosi Mantai Perdana Online di sini pada Ahad.

Menurutnya, JPVNS tiada pengetahuan sama ada babi di ternak dipindahkan ke lokasi lain atau dilupuskan.

Tambah beliau, JPVNS juga tidak menerima laporan kemungkinan babi dari 19 ladang itu dijual kepada orang ramai pada harga murah atau dilupuskan.

“Sebelum ini saya telah ingatkan berhati-hati jika ada yang jual babi dengan harga yang murah.

“Kita akan teruskan pemantauan dan saya sudah minta pihak perundangan untuk melihat dari sudut undang-undang, apa lagi tindakan yang boleh diambil,” katanya.

Pada 8 April lalu media melaporkan, JPVNS mengesan kes pertama ASF di sebuah ladang di Kampung Baru Tanah Merah Site A dan mengambil tindakan melupuskan kesemua 275 ekor babi tersebut.

## Peniaga haram warga asing 'perompak' senyap wang negara

SAUDARA PENGARANG,

**SELAKU** peniaga di Pasar Pudu, Kuala Lumpur, saya boleh nampak dengan jelas bagaimana penjual ayam haram warga asing merompak duit kita secara licik.

Bermula pukul 10 malam ke atas, mereka akan mula menyembelih ayam hidup sebelum mencampakkannya ke dalam bekas berisi air. Saya tidak pasti mengapa tetapi saya syak mereka hendak melemaskan ayam tersebut.

Selepas ayam diproses, mereka akan merendam haiwan itu sekali lagi ke dalam tong air untuk memberatkan timbangan.

Lama saya perhatikan mereka ini dan antara yang saya siasat mereka ini tidak mempunyai sijil halal penyembelihan, lesen Suruhanjaya Syarikat Malaysia, tidak membayar cukai dan zakat serta tiada suntikan thyphoid. Berbeza dengan kami



**PENIAGA** warga asing membawa keluar wang keluar dalam jumlah yang banyak setiap tahun. - GAMBAR HIASAN

yang perlu ada semua itu untuk berniaga. Sebahagian pendapatan yang kami dapat, akan disalurkan semula kepada

kerajaan yang dinamakan cukai dan zakat.

Permit perniagaan mereka bercampur-campur tetapi

bekerja di dalam satu tempat. Begitu mudah mereka menumpang dengan syarikat lain. Ini amat tidak adil untuk kami peniaga tempatan!

Memang ada operasi daripada pihak berkuasa tetapi masih gagal menyekat mereka ini. Peniaga haram warga asing masih beroperasi tanpa rasa bersalah dan mengaut keuntungan secara haram dan berlebihan.

Bulan lalu saya pernah ke Bahagian Penyelidikan Jabatan Agama Islam Wilayah Persekutuan untuk membuat aduan tetapi alangkah terkejutnya saya apabila dimaklumkan tiada siapa yang ada kerana semua petugas sedang mengikuti program secara serentak. Saya amat tidak faham keadaan ini.

Bagaimana semua penguat kuasa boleh hadir program serentak?

Bagi saya, perkara ini amat penting untuk masalah umat. Ayam yang dimakan akan menjadi darah daging. Sepatutnya pihak berkaitan perlu melakukan pemeriksaan secara kerap kepada mereka ini kerana ayam dimakan setiap hari.

Selepas dicongak antara modal, untung kasar dan rugi, mereka ini beroleh paling kurang RM1 juta bersih setahun dengan hanya menjual ayam dan bayangkan berapa banyak wang tanpa cukai yang dibawa balik ke negara mereka. Rugi besar kita.

Inilah akibatnya jika pihak atasan tidak mahu turun ke bawah untuk menyiasat secara terperinci.

Siapa yang harus menjaga kepentingan dan kesejahteraan rakyat jika bukan kerajaan sendiri?

**MATO-MATO DEMO,**  
Kuala Lumpur



BAKRI (kanan) meninjau penjualan daging lembu sempena Program Mempromosikan Mantai Perdana Online Negeri Sembilan di Pasar Tani Kekal Paroi, Seremban semalam.

FAMA sediakan 83 tan daging sempena mantai

## Bekalan daging raya di N. Sembilan cukup

Oleh ZAKKINA WATI  
AHMAD TARMIZI

**SEREMBAN** – Bekalan daging lembu di Negeri Sembilan mencukupi bagi menampung permintaan orang ramai sempena Aidilfitri yang akan disambut tidak lama lagi.

Pengerusi Jawatankuasa Bertindak Pertanian dan Industri Asas Tani negeri, Datuk Bakri Sawir berkata, pihak Lembaga Pemasaran Pertanian Persekutuan (FAMA) turut menyediakan sebanyak 83 tan bekalan daging menerusi pengedaran program Mantai Perdana.

"Kami memberi jaminan bekalan daging bagi sambutan Aidilfitri kali ini mencukupi.

"Menerusi program Mantai Perdana, 83 tan daging akan disediakan dan ia melibatkan penyertaan seramai sembilan pengusaha di seluruh negeri ini," katanya selepas mempromosikan Program Mantai Perdana Online Negeri Sembilan 2022 di Pasar Tani Kekal Paroi, di sini semalam.

Bakri menambah, sempena program Mantai Perdana tahun ini, buat pertama kalinya orang ramai boleh membuat pembelian dalam talian menerusi laman web [www.agrobazaar.com.my](http://www.agrobazaar.com.my).

"Ia bagi memudahkan pelanggan yang tidak mahu bersesak membeli daging. Ia juga membantu pihak peternak mengetahui kuantiti pembelian daging yang diperlukan serta elak pembaziran ketika hari mantai.

"Pelanggan yang berminat membeli daging secara dalam talian hanya perlu melayari laman web itu dan membuat pembayaran seterusnya mengambil daging di 13 buah lokasi yang ditetapkan pada 30 April ini," katanya.

Ujar Bakri, pihaknya menyasarkan tiga tan bekalan daging terjual secara dalam talian.



IZHAR (kiri) melihat peniaga ayam di Karnival Jualan Mega Prihatin di Pasar Tani Stadium Shah Alam semalam.

## Harga enam barang diturunkan di Shah Alam

**SHAH ALAM** – Kerajaan negeri memberikan harga diskaun untuk enam barangan utama yang dijual di 29 lokasi Karnival Jualan Mega Prihatin bagi membantu persiapan Aidilfitri.

Menurut Pengerusi Jawatankuasa Tetap Infrastruktur, Kemudahan Awam dan Pemodenan Pertanian dan Industri Asas Tani, Ir. Izhaz Hashim, ia meliputi ayam segar, daging pejal, tulang lembu, telur ayam gred B, minyak masak peket dan ikan.

Katanya, penjualan itu akan bermula hari ini hingga 1 Mei bagi memberikan lebih pilihan men-

dapatkan harga barangan dalam kadar lebih murah.

"Ayam segar akan diberi diskaun sebanyak RM4 seekor, daging pejal diskaun RM7 satu kilogram dan tulang lembu diskaun RM5 satu kilogram.

"Manakala telur ayam gred B satu bekas kebiasaannya berharga RM12.70 akan diberi diskaun sebanyak RM2.30. Minyak masak diskaun 50 sen sepeket dan ikan diskaun RM2 setiap satu kilogram," katanya.

Beliau sebelum itu hadir pelancaran Karnival Jualan Mega Prihatin di Pasar Tani Stadium

Shah Alam semalam.

Izhaz menambah, pihaknya akan memastikan jumlah bekalan bagi enam barangan tersebut mencukupi dalam memastikan kelancaran karnival tersebut.

"Kerajaan negeri telah menjalankan Jualan Prihatin Rakyat sejak Februari lalu dengan peruntukan awal RM500,000.

"Bagi Jualan Mega Prihatin sahaja melibatkan keseluruhan RM600,000 dengan masing-masing RM300,000 disediakan kerajaan negeri dan Menteri Besar (Pemerbadanan) Selangor," katanya.

## Daging lembu di Indonesia RM44 sekilogram

**JAKARTA** – Harga daging lembu di Indonesia melonjak kepada 150,000 rupiah (RM44.83) untuk satu kilogram (kg) menjelang sambutan Hari Raya Aidilfitri, lapor laman berita Detik kelmarin.

Berdasarkan tinjauan Detik di pasar-pasar basah setempat, ramai peniaga mengakui bahawa harga daging berkemungkinan boleh meningkat lagi ke paras 180,000 rupiah (RM53.80) untuk satu kilogram dalam masa terdekat.

Menurut seorang peniaga

tempatan bernama Oji, harga daging lembu telah naik sebanyak 10,000 rupiah (RM2.99) bagi satu kilogram daripada harga sebelumnya iaitu 140,000 (RM41.85) sekilogram menjelang puasa.

"Berdasarkan maklumat daripada rumah-rumah sembelihan, kira-kira dua ke tiga hari menjelang lebaran, harga daging dijangka meningkat kepada sekitar 170,000 rupiah hingga 180,000 rupiah (RM50.81 hingga RM53.80) sekilogram."

"Ini bagaimanapun hanyalah jangkaan, namun kami berharap

harga daging tidak akan melonjak ke tahap itu."

"Susah untuk kami menjual kalau harga naik," katanya.

Selain daging lembu, harga bawang putih dilaporkan turut melonjak sehingga mencecah 40,000 rupiah (RM11.96) sekilogram setakat ini.

"Harga bawang putih biasa kini 40,000 rupiah (RM11.96) sekilogram, padahal sebelum ini ia dijual sekitar 30,000 rupiah (RM8.97) untuk sekilogram," kata seorang peniaga bernama Mardi.

— AGENSI



**HARGA** daging lembu dijangka boleh meningkat sehingga 180,000 rupiah (RM53.80) menjelang lebaran. — GRANDIOS ZAFNA



**KERAJAAN** perlu mengambil tindakan tegas termasuk mengkaji semula import daging sembelihan jika dakwaan cara sembelihan haiwan melanggar protokol benar-benar berlaku. — GAMBAR HIASAN

## Jakim jangan lengah siasatan

**Dari muka 1**

Semalam, *Mingguan Malaysia* melaporkan pendedahan seorang bekas pekerja sebuah rumah penyembelihan di Australia yang mengesahkan dakwaan serta bukti rakaman video cara sembelihan haiwan di situ melanggar protokol adalah benar.

Dia yang enggan namanya didedahkan berkata, rumah itu sepatutnya hanya melaksanakan kerja penyembelihan kira-kira 4,000 ekor haiwan sehari mengikut kapasiti loji yang mempunyai tiga petugas untuk melakukannya, namun diarah memproses sehingga 6,500 ekor sehari demi mengejar keuntungan.

"Segala bukti yang didedahkan berhubung ketidakpatuhan halal sebuah rumah sembelihan di Australia sah, saya saksi

dengan 'mata kepala' sendiri," jelasnya.

Sumber terbabit yang pernah menjalankan operasi penyembelihan di situ mendedahkan, sebelum bertindak aduan dan membangkitkan perkara tersebut kepada wakil Jakim dan Supreme Islamic Council of Halal Meat in Australian Inc. (SICHMA), namun tidak diambil peduli.

Perkara terbaharu susulan laporan akhbar ini yang mendedahkan, terdapat rumah penyembelihan kambing biri-biri di Australia yang mendapat pengiktirafan Malaysia dan Singapura didapati melanggar protokol sembelihan halal.

Menurut laporan yang disokong saksi, kambing biri-biri dilemaskan dalam darah yang terkumpul daripada hai-

wan yang disembelih sebelumnya dan bukannya kerana haiwan itu disembelih sebagaimana syarat dalam keperluan penyembelihan halal.

Dalam pada itu, Nadzim berkata, kerajaan perlu mengambil tindakan tegas termasuk mengkaji semula import daging sembelihan jika dakwaan itu didapati benar-benar berlaku.

Bagaimanapun, jelas beliau, siasatan dan pemantauan perlu dilakukan secara teliti terlebih dahulu bagi memastikan dakwaan itu sah atau sebaliknya.

"Pihak berkuasa kena hantar pegawai risikan walaupun mereka mengarahkan pegawai pemantau untuk memantau kerana mungkin ada pusat penyembelihan ikut prosedur standard operasi ketika pemantauan, tetapi hari lain, lain pula jadinya," katanya.

## KARTEL AYAM

Berikut rajah yang menunjukkan setiap proses dalam industri ayam dan bagaimana kartel mengawal proses tersebut.

### 1. STOK INDUK AYAM

Kartel kawal stok induk ayam, sama ada daripada sumber tempatan sedia ada atau yang diimport dari Amerika Syarikat, United Kingdom dan Kesatuan Eropah.

### 2. LADANG BAKA

Penghasilan telur ayam daripada stok induk untuk penetasan.

### 3. PUSAT PENETASAN

Penetasan telur ayam menjadi anak ayam (*Day-old chick* atau DOC).



4. LADANG AYAM  
Ada kira-kira 2,600 ladang mengeluarkan 2.2 juta ekor ayam dewasa sehari.

### 7. PEMASARAN DAN PENGEDARAN

### 6. PROSES LANJUTAN

Pengeluaran produk hiliran seperti ayam kisar, burger, sosej dan nugget ayam.

### 5. PENYEMBELIHAN DAN PEMROSESAN

Cuma 30 peratus diproses di kilang yang memenuhi piawaian keselamatan makanan bertaraf dunia.

## Kartel ibarat raja

Dari muka 1

Kata sumber, kartel-kartel itu membuat keuntungan berlipat ganda dengan memainkan harga anak ayam dan dedak kepada penternak, kemudian menekan peruncit pula apabila menjual ayam dengan harga tinggi dan mengakibatkan pengguna yang terpaksa menanggung kenaikan kos tersebut.

Menurutnya, oleh sebab kartel menguasai industri bernilai berbilion ringgit, maka mereka sengaja memutar belit maklumat berkenaan industri ayam sehingga menampakkan seolah-olah penternak dan peruncit yang bersalah menaikkan harga sesuka hati supaya kerja kotor mereka tidak terdedah untuk melindungi monopoli selama puluhan tahun ini.

"Bukan seperti fahaman umum, proses pengeluaran ayam tidak bermula di peringkat penternak, malah lebih awal iaitu di peringkat mengimport induk ayam yang disebut *great grandparent stock* dari United Kingdom, Kesatuan Eropah mahupun Amerika Syarikat. Seawal proses ini sudah dikuasai kartel.

"Kemudian, induk ini dihantar ke ladang baka untuk menghasilkan telur. Peringkat seterusnya, telur dihantar ke pusat penetasan untuk menghasilkan anak ayam berusia sehari bagi pembakaan, dikenali *day old chicken* (DOC) sebelum dihantar kepada penternak seluruh negara," katanya.

Mengulas lanjut, sumber berkata selepas penternak menerima bekalan anak ayam daripada kartel, mereka akan membela anak ayam tersebut dalam tempoh tertentu, sebelum kartel datang membeli ayam tersebut.

"Pada waktu ini, kartel yang



**Selepas penternak menerima bekalan anak ayam dari kartel, mereka akan membela anak ayam tersebut dalam tempoh tertentu, sebelum kartel datang membeli ayam tersebut."**

SUMBER

juga dikenali dalam industri sebagai integrator akan serahkan bil kepada penternak. Bil ini disebut sebagai penyata integrator.

"Kami ada bukti, dalam penyata integrator bertarikh 31 Mac tahun ini, kartel beli ayam daripada penternak dengan harga RM4.60 sekilogram. Untuk makluman, berat ayam di pasaran biasanya dua kilogram seekor, bermakna kartel cuma beli daripada penternak dengan harga purata RM9.20 bagi seekor ayam.

"Harga RM9.20 ini, sudah termasuk kos makanan. Maksudnya, harga makanan diserap oleh penternak bukannya kartel. Dalam penyata integrator itu jelas buktikan penternak yang kena bayar dedak kepada kartel berharga RM98.50 bagi dedak kecil dan RM96.50 untuk dedak besar," katanya.

Sumber menjelaskan, selepas itu penternak akan hantar ayam ke pusat sembelihan yang kosnya

kira-kira RM1.50 seekor ayam, termasuk upah pembungkusan.

"Jadi, kos kartel setakat itu ialah RM9.20 dan RM1.50, kemudian campur kos pengangkutan. Apabila dicampur semua, kos mereka cuma kira-kira RM11 untuk seekor ayam. Sekarang cuba fikir, pada bulan April, rakyat mengeluh sebab harga ayam mencecah RM20 seekor yang beratnya dua kilogram. Ini sebab harga siling kartel cecah RM10 sekilogram. Rakyat bayar ayam harga Yahudi, tapi di belakang, kartel untung hampir 100 peratus," katanya.

Mengulas lanjut, sumber berkata, antara alasan kartel harga ayam di pasaran sukar dikawal kononnya akibat kenaikan harga jagung yang diimport, sedangkan kos itu bukan ditanggung kartel sebaliknya dibayar oleh penternak.

Malah lebih jelik, sumber mendakwa kartel juga mensabotaj usaha kerajaan memperkenalkan bahan alternatif dedak ayam menggunakan isirong kelapa sawit (PKE).

"Pada 2017, Sime Darby dan Lembaga Minyak Sawit Malaysia (MPOB) memperkenalkan PKE sebagai ramuan tambahan sokongan untuk makanan ayam selain jagung dan soya. Namun, ia mendapat tentangan daripada kartel yang dipercayai menguasai sektor import jagung.

"Saya syak, kartellah yang melobi kerajaan supaya tidak menggunakan PKE yang merupakan bahan mentah tempatan sebagai makanan ayam, sebab ini akan menjejaskan perniagaan mereka," katanya.

Penyata integrator bertarikh 31 Mac 2022 membuktikan kartel beli ayam daripada penternak dengan harga RM4.60 sekilogram malah mengenakan bayaran dedak kepada penternak.

"Sepatutnya, kos temakan mampu ditanggung penternak jika harga ayam yang dijual tidak mengikut harga yang dikawal oleh kartel. Maknanya harga yang berpatutan yang diambil

dari ladang ternakan seterusnya ayam yang boleh dijual mengikut harga pasaran sebenar," kata sumber itu yang melihat isu kartel sukar dibanteras.

Kata sumber itu lagi, jika kerajaan gagal membela nasib penternak di Johor sehingga mereka benar-benar gulung tikar, bekalan ayam akan terjejas dan mencetuskan masalah kepada rakyat lebih-lebih lagi menjelang sambutan Aidilfitri awal bulan depan.

#### BAKAR ANAK AYAM KAWAL HARGA

Dalam pada itu, satu sumber lain berkata, bagi mencengkam industri ayam, kartel akan mengawal bekalan anak ayam bagi tujuan pembakaran di seluruh negara.

Sumber itu memberitahu, sebagai contoh kartel-kartel berkuasa menentukan berapa jumlah anak ayam yang mahu berada di pasaran setiap hari sekali gus dengan bebas menetapkan harga anak ayam tanpa disekat oleh kerajaan.

Kata sumber, banyak situasi jika terlalu banyak ayam di pasaran, kartel tergamak membakar anak ayam bagi memastikan bekalan dalam pasaran berkurangan, sekali gus boleh menaikkan harga dengan alasan stok terhad.

"Berbeza dengan fahaman umum kononnya penternak yang menetas anak ayam, sebenarnya stok anak ayam untuk dijadikan baka di negara ini dikawal oleh kartel.

"Setiap hari, mereka akan menetas telur ayam di pusat penetasan. Apabila anak ayam menetas dan berusia sehari, mereka hantar anak-anak ayam kepada penternak di seluruh negara.

"Penternak cuma membela ayam 30 ke 45 hari, selepas itu ayam terus dijual ke pasaran," katanya.

**ADA pihak-pihak keliru dengan fungsi MAFI sehingga penternak mendakwa mereka diperhambakan oleh kartel.**  
- UTUSAN/FAISOL MUSTAFA



**PENTERNAK mendakwa harga ayam dikawal kartel yang menentukan bekalan setiap hari ke pasaran.** - UTUSAN/FAUZI BAHARUDIN

Menjelaskan lanjut, sumber mendakwa, kerajaan tiada kawalan ke atas bekalan anak ayam dan stok ayam di pasaran sebaliknya industri itu dikawal kartel seratus peratus.

#### MAFI TIDAK BERFUNGSI

Memberi contoh, Jabatan Veterinar pada Januari sehingga Julai 2020, merekodkan ketidakstabilan harga anak ayam ketara dan perkara tersebut menunjukkan kerajaan hilang kawalan

ke atas bekalan anak ayam, sebaliknya menyerahkan kepada kartel untuk menentukan bekalan dan harganya ke pasaran.

"Merujuk statistik itu, pada 8 Mei 2020, harga terendah anak ayam cuma 80 sen seekor, tapi pada 3 Julai 2020 harga naik mendadak sehingga RM2.50 seekor.

"Soalnya, kenapa kerajaan seakan-akan tidak mampu bertindak bagi mengawal perkara itu? Apa yang Kementerian

Pertanian dan Industri (MAFI) buat, sedangkan mereka ada agensi seperti Jabatan Veterinar untuk pantau industri ayam agar sentiasa stabil," kata sumber itu.

Untuk rekod, kali terakhir Jabatan Veterinar memaparkan harga anak ayam bagi tujuan baka adalah pada 2020, dalam laman sesawang [www.dvs.gov.my/index.php/pages/view/2951](http://www.dvs.gov.my/index.php/pages/view/2951).

Semakan mendapati, harga anak ayam pembakaan sepanjang tahun itu turun naik secara drastik, dengan yang tertinggi memecah RM2.50 seekor pada 3 Julai 2020.

#### PEMBEKAL CAMPUR ANAK AYAM TIDAK BERKUALITI

Sementara itu, di Selangor, Setiausaha Persatuan Penternak Ayam Negeri Selangor (PPANS), Mohd. Muzamri Soib berkata, penternak negeri tersebut sedang dilanda masalah apabila mendakwa pembekal sengaja mencampur aduk anak ayam

**Penternak negeri Selangor sedang dilanda masalah apabila mendakwa pembekal sengaja mencampur aduk anak ayam berkualiti dengan yang tidak berkualiti."**

**MOHD. MUZAMRI SOIB**

berkualiti dengan yang tidak berkualiti.

Menurut beliau, sikap kapitalis pembekal anak ayam di negeri tersebut merisikokan penternak rugi apabila ayam yang diternak tidak membesar seterusnya tidak boleh dijual.

"Perkara ini jika berterusan bukan sahaja mengganggu pusingan modal penternak tetapi masalah lebih besar pasaran ayam mentah di negeri ini terganggu lebih-lebih lagi dekat raya," kata beliau ketika ditemui baru-baru ini.

Selain itu, dedah Muzamri, dasar pihak berkuasa tempatan (PBT) terhadap penternak yang menyusahkan sejak kebelakangan ini juga turut memberi tekanan kepada penternak sehingga ada yang mengambil keputusan untuk menutup atau menghentikan operasi reban mereka.

Jelas beliau, di Selangor terdapat tiga syarikat ternakan melibatkan sembilan hingga 10 ladang sukar untuk beroperasi berikutan keperluan mengeluarkan belanja tambahan bagi mematuhi peraturan-peraturan PBT seperti pelan pembinaan pusat ternakan.

"Selangor juga ada sembilan daerah dan setiap daerah ada syarat yang berbeza-beza. Masalah ketidakseragaman itu menyukarkan persatuan membantu penternak menguruskan perusahaan reban mereka mematuhi peraturan PBT, begitu juga di Johor.

"Namun untuk mematuhi-nya, penternak terpaksa berbelanja lebih RM100,000 dan ada yang terpaksa menanggung kos lebih setengah juta ringgit. Hal demikian menyebabkan penternak mengambil keputusan untuk menutup operasi," luahnyanya.

Kata Muzamri lagi, perkara itu sudah dibangkitkan kepada MAFI dan Jabatan Veterinar supaya membantu penternak mengelakkan kerenah birokrasi PBT bagi menjamin bekalan makanan negara stabil.



# Larangan import lembu, kerbau Thailand dimansuh

Malaysia tambah beberapa syarat ketat sebelum ternakan boleh dibawa masuk

Oleh Amir Mamat  
bhnews@bh.com.my

**Jasin:** Larangan import lembu dan kerbau dari Thailand sejak pertengahan tahun lalu berikutan penularan penyakit *Lumpy Skin Disease* (LSD) yang dilaporkan di lebih 41 wilayah di negara itu, sudah dimansuhkan berkuat kuasa 15 Mac lalu.

Timbalan Menteri Pertanian dan Industri Makanan (MAFI), Datuk Seri Ahmad Hamzah, berkata pemansuhan larangan itu disertakan beberapa syarat ketat terhadap pihak berkuasa Thailand sebelum ternakan itu dibenarkan dibawa masuk ke Malaysia.

Antara syarat terbabit, katanya, lembu dan kerbau yang dibenarkan dibawa masuk perlu dikuarantin selama 35 hari di fasiliti kuarantin bagi lembu ternakan dan tenusu, manakala 28 hari bagi lembu sembelihan.

Beliau berkata, ternakan dari negara itu juga perlu dipastikan tiada jangkitan penyakit kuku



Ahmad melihat demonstrasi membuat kuih selepas merasmikan Festival Kuih Tradisional peringkat negeri Melaka di RTC Sungai Rambai, Jasin, semalam. (Foto Amir Mamat/BH)

dan mulut (FMD), *tuberculosis* serta LSD jika mahu diimport.

"Pegawai Jabatan Perkhidmatan Veterinar (JPV) akan mengesahkan ternakan itu bebas daripada sebarang penyakit sebelum dibenarkan dibawa masuk ke Malaysia. Jika haiwan sah dijangkiti LSD, FMD serta *tuberculosis*, tidak akan dibenarkan masuk.

"Kita perlu memastikan kesihatan pengguna serta ternakan lain tidak terdedah kepada penyakit," katanya ketika ditemui media selepas Festival Kuih Tradisional peringkat negeri Melaka di pekarangan Pusat Transformasi Luar Bandar (RTC) Sungai Ram-

bai, di sini semalam.

Malaysia menghentikan serta-merta import lembu dari Thailand pada 7 Jun 2021 selepas kebanyakan haiwan itu yang diternak di negara berkenaan disahkan dijangkiti LSD yang mungkin boleh memudaratkan jika dibawa masuk ke negara ini.

Jumaat lalu, Thailand dilaporkan sedia membekal semula lembu ke negara ini dengan mematuhi semua peraturan dan prosedur import ditetapkan JPV Malaysia, khususnya untuk ibadah korban menjelang Aidiladha pada Julai nanti.

Pengarah Bahagian Kerjasama

Antarabangsa Ternakan, Jabatan Pembangunan Ternakan Thailand (DLD) Dr Wacharapon Chotiyaputta, berkata negaranya mempunyai kemudahan, kapasiti dan bekalan mencukupi untuk eksport.

Pemain industri, termasuk pengeksport dan penternak lembu di Thailand juga memberi jaminan akan mematuhi peraturan dan prosedur import Malaysia untuk memastikan ternakan bebas daripada penyakit.

Pada 2021, Malaysia mengimport sebanyak 12,405 lembu dari Thailand sempena Aidiladha berbanding 12,553 ekor pada 2020.

## Projek tanam jagung lepas Aidilfitri

**Shah Alam:** Kerajaan Selangor akan memulakan projek penanaman jagung untuk makanan ayam selepas Aidilfitri sebagai usaha mengatasi isu kenaikan harga makanan ternakan itu.

Pengerusi Jawatankuasa Tetap Infrastruktur & Kemudahan Awam dan Pemodenan Pertanian & Industri Asas Tani negeri, Ir Izham Hashim, berkata projek tanaman menerusi Program Intervensi Ehsan Perbadanan Kemajuan Pertanian Selangor (PKPS) dijalankan atas tanah 162 hektar di Negeri Sembilan, manakala 121 hektar lagi di negeri ini.

Beliau berkata, langkah itu bertujuan mengurangkan keberuntungan terhadap import makanan ayam yang ketika ini memecah bilion ringgit dan disifatkan tidak munasabah.

"Pihak PKPS juga sudah mendapatkan satu syarikat yang berpengalaman dalam penanaman jagung untuk makanan ayam.



Izham melawat gerai ayam selepas sidang media khas Jualan Prihatin Rakyat Mega sempena Aidilfitri di Pasar Tani Seksyen 13, Shah Alam, semalam. (Foto BERNAMA)

"Jadi, kita akan lihat bagaimana ia dapat menyumbang kepada kestabilan harga makanan ayam.

"Kita harap perkara ini dapat dilaksanakan dalam masa terdekat supaya (isu) harga ayam bo-

leh diselesaikan, bukan setakat stabil tetapi diturunkan lagi.

"Jika berjaya dilaksanakan, Selangor akan menjadi pelopor (penghasilan jagung untuk makanan ayam)," katanya pada sidang media Jualan Prihatin Ra-

kyat Mega di Pasar Tani Seksyen 13 di sini, semalam.

Hadir sama, Ketua Pegawai Eksekutif Kumpulan PKPS, Dr Mohamad Khairil Mohamad Razi dan Ketua Pegawai Eksekutif Menteri Besar Selangor (Pembadanan) MBI, Norita Mohd Sidedek.

Sementara itu, Dr Mohamad Khairil berkata, lebih RM3 juta diperuntukkan bagi pelaksanaan projek penyelesaian jangka masa panjang susulan peningkatan harga makanan ayam.

Katanya, kerja pembersihan tanah di Kuala Langat Selatan dan lokasi yang sedang dikenal pasti di Negeri Sembilan giat dijalankan sebelum projek terbabit bermula.

"Sekarang dalam perbincangan terakhir untuk kerjasama rentas negeri Selangor dan Negeri Sembilan. Insya-Allah, selepas raya kita akan mulakan projek penanaman," katanya.